



Inatsisartunut ilaasortaq, Henrik Fleischer
Partii Naleraq
/ Maani

ATV-t pillugit § 37 naapertorlugu apeqquteqaammut 2017-185-mut akissut

29-08-2017
Sags nr.: 2017 - 16867
Dok. nr. 22789119

Asasara Henrik,

apeqqutinut, Inatsisartut suleriaasianni § 37 naapertorlugu nassiussannut qujanaq.
Apeqqutit matuma kinguliani ataasiakkaarlugit akineqarput.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Akissuteqarnissamut atugassanik Akileraartarnermut Aqutsisoqarfimmuut aamma
Namminiilivinnermut, Nunanut Allanut Nunalerinermullu Naalakkersuisoqarfimmuut
paasissutissanik piniartooqarpoq.

Apeqq. 1 pillugu. Sisamanik assakaasullit nunaannakoorutit (ATV) kalaallit nunatsinniitut qanoq amerlatigippat ?

ATV-t naatsorsornissaat ajornakusoorpoq, qamutit assakaasullit nunakoorutit minnerit
sisamanik arfinilinnilluunniit assakaasooqarnermut apeqqutaatinneqarneq ajormat.
Tassalu taamaallaat qamutit assakaasullit nunakoorutit minnerit ataatsimut
amerlassusaat paasissutissiissutigineqarsinnaavoq. Akileraartarnermut Aqutsisoqarfiup
naatsorsugai malillugit qamutit assakaasullit nunakoorutit minnerit 332-iupput.

Apeqq. 1a pillugu. Nammineq inuttut pigisat qassiuppat?

Tamanna kisitsisitigut paasissutissiiffigineqarneq ajortoq Akileraartarnermut
Aqutsisoqarfik ilisimatitsivoq.

Apeqq. 1b pillugu. Namminersorlutik Oqartussanit atorineqartut qassiuppat?

Qamutit assakaasullit nunakoorutit minnerit qulingiluat Namminersorlutik Oqartussanit
pigineqartutut nalunaarsorneqarsimasut kisitsinikkut paasineqartoq Akileraartarnermut
Aqutsisoqarfimmit ilisimatitsissutigineqarpoq. Taakkununga suliffeqarfiit
Namminersorlutik Oqartussanit pigineqartut ilaatinneqanngillat.

Apeqq. 1c pillugu. Kommuninit atorineqartut qassiuppat?

Qamutit assakaasullit nunakoorutit minnerit katillugit 42-t kommuninit pigineqartut
Akileraartarnermut Aqutsisoqarfik ilisimatitsivoq.

Apeqq. 1d pillugu. Aalisartunit/Piniartunillu atorineqartut qassiuppat?

Tamanna kisitsisitigut paasissutissiiffigineqarneq ajortoq Akileraartarnermut
Aqutsisoqarfik ilisimatitsivoq.

Apeq. 1e pillugu. Savaatilinnit atorneqartut qassiuppat?

Namminiilivinnermut, Nunanut Allanut Nunalerinermullu Naalakkersuisoqarfiup kisitsisitigut paasissutissaatai malillugit ATV-t savaatilinnit pigineqartut 59-iupput.

Apeq. 1f pillugu. Nunaqarfinni sulinermi atorneqartut qassiuppat?

Tamanna kisitsisitigut paasissutissiiffigineqarneq ajortoq Akileraartarnermut Aqutsisoqarfik ilisimatitsivoq.

Apeq. 2 pillugu. Sisamanik assakaasullit nunaannakkoortit (ATV) qassit sillimaserneqarsimasutut allaqqappat?

Qamutit assakaasullit nunakkoortit minnerit tamarmik tunngaviumik inatsisit malillugit akisussaasuunermut sillimaserneqarsimasussaapput, tak. Kalaallit Nunaanni angallannermut inatsit pillugu nalunaarummi (LBK NR 995 af 26/10/2009) § 49, imm. 1. Tassalu taakku danskit naalagaaffianit, Namminersorlutik Oqartussanit kommuninilluunniit pigineqanngippata, taamaalillutillu § 53 naapertorlugu nammineerluni sillimaserneqarsimappata.

Apeq. 3 pillugu. Sisamanik assakaasullit nunaannakkoortit (ATV) atussagaanni kalaallit Nunaanni suut piumasaqaataappat?

ATV-nik atuinissamut piumasaqaataapput:

- Nalunaarsuititsineq biilinu maleruagassat malillugit pissaaq.
- Aquttoq biilersinnaanermut allagartaqassaaq.
- Atortuni traktorinut maleruagassat malinneqassapput.
- Qamutit assakaasullit taamaallaat 30 km/t tikillugu sukkassuseqarsinnaassapput.

Apeq. 4 pillugu. Sisamanik assakaasullit nunaannakkoortit (ATV) nunaqarfinni sulinermi atorneqartut suli iluamik aqqusinilersorneqanngitsuni soorlu 1000-tit ataallugit inulinni, motorilinnut ingerlatsinissamut allagartaqaaqqaanngikkaluarluni atorneqalernissaannut aporfiit suut iluarsineqassappat?

Kalaallit Nunaanni inuit toqqartorneqartut biilersinnaanermut allagartaqaratik ATV-nik nunakkoortinik atuisinnaassappata, Kalaallit Nunaanni angallannermut inatsit allanngortinneqartariaqarpoq. Angallannermut inatsit naalagaaffiup susassaqarfigaa.

Apeq. 5 pillugu. Sisamanik assakaasullit nunaannakkoortit (ATV) inuussutissarsiutigalugu piniartunit aalisartunit pisanik assartuunermut nunaannakut sikukkullu atorneqarnerini 30km/t-imik sukkaneruumik ingerlasinnaalernissaannut ammaassiniarnissamut aporfiit suut iluarsineqassappat 30km/t-imik sukkaneruumik piniarnermik aalisarnermillu inuutissarsiteqartut ingerlasinnaalissappat aammalu motorilinnut ingerlatinissamut allagartaqaaqqaanngikkaluarluni nunaannarmi sikumilu assartuutit ingerlatsinnaalersissagutsigit aporfiit suut iluarsineqassappat?

Qamutinik assakaasulinnik motorilinnik nunaannarmi atuisarneq Namminersorlutik Oqartussat angallatinik motorilinnik atuneq pillugu nalunaarutaannut ilaatinneqarpoq,

tassanilu ataatsimut isigalugu qamutininik assakaasulinnik motorilinnik assartuinermit aqquutit avataanni nunaannarmi atuineq inertequtiginerpoq, piniarnermi sulianut immikkut ittunik akuersissuteqarnissamut periarfissiisoqarluni.

Kalaallit Nunaanni angallannermut inatsit susassaqaqfinnut, nalinginnaasumik angallaviusunut tamanut atuutsinneqarpoq. Nunaqaqfinnut assartuinernullu aqquutinut atuutiinnanngilaq, aammali asimi inuit angallaviinut atuutsinneqarpoq. Tassalu inuussutissarsiutigalugu aalisartunut piniartunullu maleruagassanik immikkut ittunik atuutsitsisoqassappat, Kalaallit Nunaanni angallannermut inatsit allangortinneqartariaqarpoq. Angallannermut inatsit naalagaaffiup susassaqaqfigaa.

Nunaannarmi angalanermit biilersinnaanermut allagartaqarnissamut apeqqut Kalaallit Nunaanni biilersinnaanermut maleruagassanik iluarsaassisoqarsinnaanissaanut suleqatigiissitamut ataatsimoortumut, Ole Birk Olesen-imut isumaqatigiissutigineqartumut ilaatinneqassaaq. Suleqatigiissitamut aamma kommunit, Kalaallit Nunaanni Politiit inuussutissarsiutinillu ingerlataqartut ilaatinneqassapput. Aammattaaq apeqqut 4-mut akissut takuuk.

Apeqq. 6 pillugu. Sisamanik assakaasullit nunaannakkoortit (ATV) inuutissarsiutigalugu piniartunit, aalisartunillu, savaatilinnillu aammalu atornerqarnerinut piunasaqaatit, sneecooterit atornerqarnerinut piunasaqaatitulli ilersissagutsigit suut iluarsissavagut?

ATV-nik atuinermut tunngatillugu angallannermut inatsimmi savaatilinnut, inuussutissarsiutigalugu aalisartunut imaluunniit inuussutissarsiutigalugu piniartunut maleruagassanik immikkut ittunik atuutsitsisoqanngilaq.

ATV-nik atuineq qamuterallannik atuinissamut piunasaqaatinut sanilliunneqassappat, Kalaallit Nunaanni angallannermut inatsit allangortinneqartariaqarpoq. Angallannermut inatsit naalagaaffiup susassaqaqfigaa. Aammattaaq apeqqut 4-mut akissut takuuk.

Nunatsinni innuttaasunut piunasaqaatit sumiiffinni avatangiisinut unammilligassaasinnaasunullu naleqqussarneqarsimanissaat Naalakkersuisunut pingaaruteqarpoq. Taamaattumik nunaqaqfinni ATV-nik atuinissamut biilersinnaanermut allagartaqarnissamut piunasaqaammut apeqqut pillugu Assartuussinermit, Illuuteqarnermut Ineqarnermullu ministeri Ole Birk Olesen oqaloqatigaara, aammalu suliaq ingerlaavartumik malinnaaffigalugu.

Aggustip qaammataani siusinnerusukkat Ole Birk Olesen-ip ataatsimeeqatiginerani atorfilinnut suleqatigiissitamik ataatsimoortumik, Kalaallit Nunaanni biilersinnaanermut allagartanut maleruagassanik iluarsaassisinnaanermut periarfissanik misissuisussamik pilersitsinissamik isumaqatigiissuteqarfigaara. Suleqatigiissitap sulineranut aamma kommunit, Kalaallit Nunaanni Politiit inuussutissarsiutinillu ingerlataqartut akulerutsinneqassapput.

Biilersinnaanermut allagartaqarnermut maleruagassat iluarsanneqarnerini, maleruagassat ataatsimut qanoq iliorluni inuiaqatigiinnut kalaallinut aammalu illoqarfinni nunaqaqfinnillu innuttaasunut pitsaanerulersitsinnaanersut misissuiffigineqassaaq. Ilaatigut maleruagassat inuussutissarsiutinik ingerlataqarnermut isumaat, aquttut, ilaasut angallattullu allat isumannaassusaannut isumaat aammalu avatangiisinut sunniutissaat misissuiffigineqassapput. Tassani aamma aaqqiissutissamik, ataatsimut isigalugu pitsaanerusumik nassaarniarluni maleruagassat oqinnerulersinniarlugit periarfissat assigiinngitsut misissuiffigineqassapput.

Naggasiutigalugu akissuteqaatip kingusinaarnera utoqqatsissutigaa, neriuppungalu matuma siuliani allassimasut apequtinnut akissuteqaataasimassasut.

Inussiarnersumik inuulluaqqusillunga

Erik Jensen